

starogradski

OPĆINA STARI GRAD
SARAJEVO




MUNICIPALITY OF STARI
GRAD SARAJEVO

haber

BESPLATAN PRIMJERAK • JUNI, 2015. broj 26.

Arheološki park
At mejdan

- 2-3 Otvaranje arheološkog parka At mejdan
- 4 Rekonstrukcija ulice Strošići na Vratniku
- 6 Sjednice Općinskog vijeća
- 8-9 Komunalni projekti
- 10-15 Obilježavanje "Dana općine"
- 16 Planirana izgradnja stadiona na Faletićima
- 18 Predstavljamo uspješne male privrednike: Emir Moro, uzgajivač riba
- 19 Staro Sarajevo



Impressum

- Izdavač:** Općina Stari Grad Sarajevo
- Tiraž:** 2.000
- Pripremi:** Almedina Porča
Alma Imamović
- DTP:** Safet Mališević
- Fotografije:** Safet Mališević
- Štampa:** "Pentagram" d.o.o.
- Adresa:** Zelenih beretki br. 4
71000 Sarajevo
- web:** www.starigrad.ba
- e-mail:** info@starigrad.ba
- Tel./fax:** +387 33 282 385
+387 33 217 916



Projekti



Arheološki park u At mejdanu svečano otvoren

Donatori iz Republike Turske finansirali radove konzervacije parka ● Altepe i Hadžibajrić svečano otvorili park ● Nacionalni spomenik danas čine ostaci Bakr-babine džamije, Misrijine medrese, Kantamirijine kutubhane, mekteba i harema

Arheološkom lokalitetu At mejdan ponovo je udahnut život, nakon što su u XIX stoljeću reurbanizacijom austougarskih vlasti porušeni svi vjersko-prosvjetni objekti sagrađeni od strane Osmanlija: džamija, medresa, kutubhana... Zahvaljujući velikodušnim donatorima iz turskog grada Bursa, sagrađena je Bakr-babina džamija, a 04. maja je svečano otvoren i konzervirani arheološki park.

Radovi se odvijali u dvije faze

Prva faza konzervacije arheoloških iskopina u At mejdanu rađena je 2012. godine, pod nadzorom Zavoda za zaštitu kulturno-historijskog i prirodnog naslijeđa Kantona Sarajevo i Vlade FBiH koja je finansirala radove. Prethodili su joj arheološki radovi izvođeni od strane JU "Muzej Sarajeva", Zemaljskog muzeja BiH i Društva arheologa 1894. Prva faza, koja je nazvana "Medresa" obuhvatila je konzervaciju iskopina ostataka medrese. Druga faza radova, otkrivanje harema sa kompletnim grobnim

mjestima, te konzervacija i sanacija ostataka Bakr-babine džamije, rađena je 2014. godine. Urađen je i most koji se prostire iznad iskopina kako bi se posjetiocima omogućila bolja prezentacija arheološkog parka. Ove radove su finansirali prijateljski turski grad Bursa, Općina Stari Grad Sarajevo i Zavod za zaštitu kulturno-historijskog i prirodnog naslijeđa Kantona Sarajevo.

Kako je prilikom svečanog otvorenja istakao načelnik Općine Stari Grad Ibrahim Hadžibajrić, najveća zahvalnost za realizaciju ovog projekta pripada gradu Bursa, odnosno gradonačelniku Redžepu Altepeu i dobrim ljudima iz tog grada koji su izdvojili potrebna finansijska sredstva. "Grad Bursa i dobri ljudi koji žive u njemu u potpunosti su finansirali gradnju Bakr-babine džamije sa 850.000 KM, te restauraciju arheološkog parka sa još 174.000 KM," kazao je Hadžibajrić. Podsjetivši prisutne da prije desetak godina mnogi skeptici nisu vjerovali u ovu ideju, te da su samo rijetki dolazili na ovo mjesto, klanjali i trudili se da spriječe izgradnju planirane ceste,



Altepe i Hadžibajrić povelili goste u obilazak parka

Hadžibajrić je kazao da se nikada ne smije zaboraviti značaj hadži hafiza Halida ef. Hadžimulića, koji je bio najistrajniji u toj ideji. "Hafiz Halid ef. Hadžimulić je dobro znao šta se nalazi na ovom lokalitetu i zahvaljujući njemu, koji je kasnije i ukopan ispred džamije, danas smo ovdje", kazao je Hadžibajrić. "Ovo je jedan vid vraćanja naše historije koja je bila zaboravljena i zatrpána sa 2,20 metara zemlje, te mnogi nisu znali da je ovdje postojalo ovo što sada vidite," dodao je on.

Bursa će nastaviti ulagati u razvoj Starog Grada

Hafiza Hadžimulića u svom obraćanju nije zaboravio ni gradonačelnik Burse, Redžep Altepe. "Rahmetli hafiz Halid ef. Hadžimulić, kojeg sam i lično poznao, ostavio nam je u amanet da obnovimo ovo vrijedno kulturno nalazište, što smo sa zadovoljstvom i uradili," kazao je Altepe. On je dodao da će Bursa i dalje pomagati razvoj i obnovu prijateljske Općine Stari Grad.

Načelnik Hadžibajrić i gradonačelnik Altepe su nakon obraćanja povelili goste u arheološki park At mejdan čime je on i zvanično otvoren za posjetioce.

At mejdan je danas istovremeno park i arheološko područje, odnosno nacionalni spomenik BiH koji se sastoji od ostataka

Bakr-babine džamije, Misrijine medrese, Kantamirijine kutubhane (biblioteke), mekteba i harema – mezaristana.

Nemjerljiv je doprinos grada Bursa i u gradnji današnje Bakr-babine džamije. Izgradnja džamije je počela 30. oktobra, 2009. godine, a svečano je otvorena 27. juna, 2011. godine. Njenu gradnju finansirao je Husein Durman, ugledni privrednik iz turskog grada Bursa, dok je džamiju također otvorio Redžep Altepe. Džamiju je projektovao ugledni sarajevski arhitekta i projektant, vrhunski poznavalac historije Sarajeva, Mufid Garibija, koji potpisuje i projekte arheološkog parka i turbeta hadži hafiza Halida ef. Hadžimulića. U unutrašnjosti Bakr-babine džamije postavljena je najduža levha u Evropi. Levha, na kojoj su uklesani dijelovi Nur dove, duga je 45 metara i postavljena je cijelom dužinom

Bakr-babine džamije. Levha se sastoji iz 45 kamenih ploča teških po 50 kilograma.



Info pano sa informacijama o lokalitetu

At mejdan kroz historiju

U XV stoljeću, kada grad Sarajevo nastaje u islamsko-orientalnoj fizionomiji, na prostoru današnjeg parka At mejdan nalazio se Sijaset-mejdan. To je bilo mjesto gdje su se izvršavale javne kazne. Vremenom je ovaj mejdan (polje ili trg) postao trgovište konjima i hipodrom, pa je po tome i dobio naziv At mejdan koji se zadržao u današnjem nazivu parka. Od XVI do XVIII stoljeća na At mejdanu nastalo je niz objekata vjersko-prosvjetnog karaktera koji su odigrali važnu ulogu u urbanističkom oblikovanju grada Sarajeva, ali i u kulturno-duhovnom oblikovanju Sarajlija! Krajem XIX st, u vrijeme austrougarske okupacije izvršena je reurbanizacija At mejdana s kojom je počelo rušenje svih prethodnih objekata. U duhu nove urbanizacije (zapadno-evropske) At mejdan je preuređen u park ili trg (1905. godine), na kojem je sagrađen Muzički paviljon sa kafanom (1913. godine) po projektu Josipa Pospišila. Paviljon je strušen prilikom njemačkog bombardovanja Sarajeva 1941. godine, a isti je obnovljen 2004. godine.

Projekti

Finansiranje nevladinog sektora

U ovoj godini za projekte nevladinog sektora izdvojeno 83.000 KM • Finansiranje po LOD metodologiji • Transparentna procedura

Predstavnici trinaest nevladinih organizacija potpisali su ugovore sa Općinom Stari Grad prema kojima će im biti uplaćena sredstva za finansiranje ili sufinansiranje projekata koje će realizovati u 2015. godini na teritoriji Starog Grada. Ukupan iznos koji je Općina Stari Grad obezbijedila budžetom za ove svrhe je 82.914,72 KM.

Amina Deljković, pomoćnica načelnika za obrazovanje, kulturu, sport i lokalni razvoj pojasnila je da je javni poziv trajao od 11. do 31. marta, te da je Komisija u sastavu: dva predstavnika zakonodavne vlasti, dva predstavnika izvršne vlasti i jedan predstavnik kojeg su izabrale same nevladine organizacije,

Pristigla 61 aplikacija

Na javni poziv raspisan u martu, pristigla je 61 aplikacija, a Komisija za ocjenjivanje i odabir projekata odabrala je 13 projekata koji su zadovoljili kriterije.

Općina već godinama izdvaja znatna finansijska sredstva za finansiranje nevladinog sektora, a u posljednje četiri godine ta oblast je uređena Odlukom o finansiranju/sufinansiranju nevladinog sektora po LOD metodologiji, što znači da su utvrđeni jasni kriteriji na koji način, kako i koji projekti mogu biti finansirani.

formirana već 4. aprila.

“Procedura je veoma transparentna i svi u njoj učestvuju. Vršiti se odabir onih projekata koji su u interesu Općine Stari Grad i njenih stanovnika,“ kazala je Deljković. Uпитana da izdvoji neki od takvih projekata koji su ranije finansirani, Deljković je istakla Udruženje “Roda” čiji je prologodišnji projekat unaprijedio i poboljšao život građana. “Posebno bih pohvalila Udruženje ‘Roda’ čiji smo projekat finansirali prošle godine, a oni su obučavali mlade ljude za prijavu na konkurse za posao, za traženje posla, intervju sa poslodavcima i upućivali



Prodanović, Kurahović, Hadžibajrić i Novotni potpisuju ugovore

naše mlade na koji način i kako mogu lakše doći do posla. Kao rezultat toga, 13-oro mladih iz Starog Grada dobilo je priliku za se zaposli,” kazala je Deljković.

Projekat za osobe treće dobi

Udruženje “Roda” dobit će sredstva i ove godine, i to za realizaciju projekta “I mi smo dio lokalne zajednice”, a direktorica Nataša Prodanović pojasnila je o čemu je riječ. “Radi se o obrazovanju lica treće

životne dobi. To je jedan pilot projekat kojim ćemo pokušati da animiramo osobe treće životne dobi za edukaciju iz oblasti informatičke tehnike, računara, smart telefona, engleskog jezika, socijalnih i društvenih vještina.” Za ovaj projekat Udruženju “Roda” odobreno je oko 7.000 KM. Pravo prijavljivanja na Javni poziv imale su sve formalno registrovane organizacije civilnog društva u skladu s važećim zakonskim propisima u BiH.

Redni broj	Naziv organizacije	Naziv projekta	Broj bodova	Odobreni iznos u KM
1	NVO Altruista “Svjetlo”	Otvorimo čula za pozorište, muziku i umjetnost	82,6	6.343,60
2	Udruženje „Green Art“	Čepočilim	80,2	6.879,00
3	PSD „Trebević“	Ekološka edukacija i aktivizam-Mala škola planinarstva	80	6.850,00
4	Udruženje „OAZA“	Rehabilitacija osoba sa intelektualnim teškoćama općine Stari Grad	79,8	5.340,00
5	Udruženje „Roda“	I mi smo dio lokalne zajednice	79,4	7.090,20
6	Fondacija „Sarajevo Navigator“	Sarajevo Navigator	78,8	6.240,00
7	KUD „Šadrvan“	Očuvanje tradicije kroz narodne igre i običaje BiH	78,7	5.492,92
8	Bošnjački institut- Fondacija Adila Zulfikarpašića	Mladi naslijeđu-Naslijeđe mladima	77,2	6.833,00
9	Udruženje oboljelih od cerebralne dječije paralize KS	Resocijalizacija članova CDP-a kroz rehabilitacione vježbe i druženja	76,8	4.894,00
10	Udruženje „COOR“	Eko kalendar Općine Stari Grad 2015	76,4	7.850,00
11	Udruženje KK „Sampi“	Košarka razvojni sport-Liga takmičenje mladih	76,2	7.650,00
12	Udruženje „Motivator“	Znanje za sve	75	5.902,00
13	Udruženje FK „Hrid“	Korner	75	5.550,00

Tabelarni prikaz organizacija, projekata i sredstava

Aktuelni projekti



Rekonstrukcija ulice Strošići

Rekonstrukcija ulice Strošići, projekat vrijedan oko 380.000 KM (prva faza) počela je 22. aprila. Na dionici od oko 450 metara dužine, koja je planirana u sklopu prve faze radova, prvo su urađeni pripremni radovi: uklanjanje kaldrme i postavljanje privremenog sistema za vodu.

jekat je veoma zahtjevan, upravo zbog velikog broja kuća koje su sagrađene uz samu ulicu, o čemu se moralo voditi računa“, ističe Handanagić.

Rekonstrukcija kanalizacione mreže tj. postavljanje oborinskih i kanalizacionih cijevi i priključaka okolnih objekata na separatnu mrežu je završena.

Radovi će se izvoditi u dvije faze

Rekonstrukcija ulice na Vratniku izvodit će se u dvije faze. Prva faza radova podrazumijevat će rekonstrukciju centralnog dijela, a u drugoj je predviđena rekonstrukcija pet krakova ulice. U obje faze radit će se kompletna izmjena infrastrukture, postavljanje novih vodovodnih i kanalizacionih cijevi, te kišnih i fekalnih odvoda. Predviđeno je postavljanje oko 800 metara kanalizacionih i vodovodnih cijevi, preko 180 individualnih priključaka, te postavljanje preko 1.000 metara kvadratnih kaldrme.

Pomoćnik načelnika za investicije, komunalne i inspeksijske poslove, Suad Handanagić je kazao je kako mu je zadovoljstvo što su radovi počeli kad su i najavljeni. „Rekonstrukcijom ulice bit će znatno popravljeni uslovi života njenih stanovnika. U ovoj ulici živi više od 300 stanovnika, u nešto više od 150 domaćinstava. Pro-

Trenutno se izvode radovi na postavljanju vodovodnih instalacija.



Završeno postavljanje kanalizacione mreže

Prva faza koštat će 380.000 KM

Finansijeri ovog velikog projekta su Ministarstvo prostornog uređenja Kantona Sarajevo i Općina Stari Grad Sarajevo. Vrijednost prve faze je oko 380.000 KM. Rok za završetak radova je 38 kalendarskih dana.

Izgradnja dva nova zida na Mošćanici

Na području mjesne zajednice Mošćanica uz saobraćajnicu na Darivi u naselju Gazin Han u toku je izgradnja dva armirano-betonska potporna zida. Oba zida Općina je odlučila izgraditi da bi se spriječilo stalno obrušavanje terena.



Radovi u završnoj fazi


Izgradnja prvog zida počela je početkom juna, a bit će izgrađen zid dužine 30 metara i prosječne visine od oko dva metra. Radovi na izgradnji ovog zida su u završnoj fazi. Projekat sa oko 23.000 KM finansira Općina Stari Grad, a izvođač radova je firma “Sela” iz Sarajeva.



Počela gradnja drugog zida

Gradnja drugog zida, nekoliko metara dalje od prvog, počela je sredinom juna. Na ovom dijelu planirana je izgradnja zida dužine oko 30 metara. S obzirom na nepristupačnost terena i veće iskope, sanacija ovog zida košta oko 30.000 KM, a izvođač radova je firma “Debos” iz Sarajeva.

Sanacija ulice Potoklinica



U toku sanacija 160 m ulice

Projekat sanacija ulice Potoklinica koja se nalazi na području Mjesne zajednice Logavina je u toku. Uređenje ulice planirano je u dužini od oko 160 metara i prosječnoj širini od oko pet metara. Projekat podrazumijeva mašinsko zasjećanje ivica postojećeg asfalta, izdizanje vodovodnih šibera i slivnih rešetki na potrebnu visinu, nabijanje tla, ugradnju tampona, te postavljanje asfalta.

Izvođač radova je KJKP „Rad“, a projekat sa oko 38.400 KM finansira Općina Stari Grad.

Općinsko vijeće

28. sjednica

Općinskog vijeća

Na sjednici Općinskog vijeća Stari Grad, održanoj 24. aprila većinom glasova usvojen je rebalans bužeta Općine. Kako je pojasnio načelnik Ibrahim Hadžibajrić, to je uobičajni postupak, a rebalans je rađen i u proteklih šest godina. "Rebalans radimo četiri puta godišnje iz jednostavnog razloga- da vidimo stanje prihoda i rashoda. Ja sam zadovoljan i nadam se da ćemo i ovu godinu uspješno završiti kao što smo i planirali", istakao je Hadžibajrić.

Izveštaj o realizaciji budžeta za period 01. januar, - 31. mart, 2015. godine, Vijeće je usvojilo većinom glasova.

U sklopu tačke Izbor i imenovanje usvojen je Zaključak da se zadužuje Komisija za propise i statut da pripremi tekst prijedloga izmjena i dopuna poslovnika Općinskog vijeća i to odredbi kojim je regulisan izbor članova radnih tijela, kako bi se omogućilo samostalnim vijećnicima da imenuju svoje članove i radna tijela.

Usvojen je i Prijedlog odluke o prestanku mandata izabranog vijećnika u Općinskom vijeću Stari Grad Sarajevo Tatjane Ljujić - Mijatović, te verifikovan mandat novog vijećnika u Općinskom vijeću Željke Lera.

Vijećnici su usvojili i Odluku o priznanjima Općine Stari Grad. Općinsku povelju sa zlatnim štitom dobiili su demobilisani borci Armije RBiH Kasim Alić i Armis Mašić koji su se svojim požrtvovanim djelovanjem naročito istakli u organizovanju i izvođenju odbrane na području Općine, te otklanjanju opasnosti od ratnih razaranja njenog

područja. Kolektivno priznanje Općinska povelja sa zlatnim štitom, dodijeljeno je Udruženju boraca "Patriotska liga Općine Stari Grad Sarajevo" za prenošenje istine o suštini agresije na RBiH.

Povelja sa grbom Općine Stari Grad Sarajevo dodijeljena je prof. Fehimu Heći za izuzetan doprinos u prosvjetnoj djelatnosti i organizovanju vaspitno - obrazovnog rada.

Općinsko priznanje Policajac godine dodijeljeno je policijskom službeniku Prve policijske uprave - Policijska stanica Stari Grad Sarajevo Kemi Musiću, za izuzetan doprinos i postignute rezultate u zalaganju za ostvarivanje što povoljnije bezbjednosne situacije na području Općine Stari Grad Sarajevo, u prethodnom jednogodišnjem periodu.

Pored ovih priznanja, Vijeće je odlučilo da dodjeli dvije zahvalnice i to Muhidinu Abazu i Fudbalskom klubu "Mošćanica".

Jednoglasno su usvojeni prijedlozi Odluke o visini naknade za pogodnosti gradskog građevinskog zemljišta -rente na području Općine Stari Grad Sarajevo za 2015. godinu, Odluke o korištenju sredstava ostvarenih prodajom poslovnih prostora i Zaključka o davanju ovlaštenja Općinskom načelniku za zaključenje ugovora o poklonu za tri stana i kupoprodajnog ugovora za jedan stan.



Dobitnici priznanja



Verifikovan mandat
Željki Leru

Verifikovan mandat Željki Leru

29. sjednica

Općinskog vijeća

Izrazivši nezadovoljstvo saradnjom sa Turističkom zajednicom Kantona Sarajevo, Općinsko vijeće Stari Grad je na 29. sjednici, održanoj 28. maja, najavilo je da će od Parlamenta FBiH tražiti da pristupi hitnom postupku izrade novog ili izmjene i dopune postojećeg zakona o turističkim zajednicama, a u skladu sa presudom Ustavnog suda FBiH, sa posebnim aspektom na lokalne zajednice. Iako je jedna od tačaka dnevnog reda trebala biti Informacija o radu Turističke zajednice KS, s posebnim osvrtom na područje općine Stari Grad, prema riječima predsjedavajućeg Općinskog vijeća Vedrana Dodika, niko iz ove ustanove se nije pojavio niti donio traženi materijal. Dodik je najavio donošenje određenih zaključaka po pitanju te tačke, što je i učinjeno tokom sjednice, uz naglašavanje značaja turizma za Općinu Stari Grad, kao i činjenice da je posjećuje sve veći broj

turista. Predloženo je da se zaključci Vijeća po ovom pitanju upute i Savezu gradova i općina FBiH, kako bi se svojim autoritetom zauzeo za rješavanje problema.

Vijećnicima je predočena i Infomacija o izmještanju životinja iz objekta kasarne "Faletići", koju je pripremila Služba za investicije, komunalne i inspeksijske poslove, postupajući prema Zaključku sa 25. sjednice Općinskog vijeća. Nadležna služba je postigla dogovor sa predstavnicima Udruženja građana "Pomoć životinjama-Help Animals" koje koristi određeni dio prostora kasarne "Faletići" kao azil za

pse, da sami izvrše izmještanje životinja i oslobode prostor.

Prema informacijama sa terena, pomenuto Udruženje je već poduzelo određene aktivnosti i preostalo je da izmjestite još oko 70 pasa, dok su drveni boksovi za životinje već srušeni, a metalni razmontirani i spremni za transport. Prema njihovim uvjerenjima, svi psi će biti izmješteni do kraja dana, a ostale kućice za pse i prateća oprema bit će uklonjeni do ponedjeljka, 01. juna. Općinsko vijeće je prihvatilo ovu Informaciju bez rasprave.

Prihvaćena je i Informacija o stanju sigurnosti na području općine Stari Grad Sarajevo koju je vijećnicima predočio načelnik PU, glavni inspektor Fahrudin Halač. Halač je iznio podatak da je u prva četiri mjeseca prošle godine u oblasti saobraćaja kontrolisano 4.074 vozilo i vozač, a ove godine 8.821. U oblasti saobraćaja izdato je 4.000 više prekršajnih naloga i sankcionisano učesnika, u odnosu na period januar-april prošle godine.



Vijećnicima predočena informacija o stanju azila Faletići

Devet novih lipa u Aleji ambasadora

Ambasadori Republike Češke, Narodne Republike Kine, Islamske Republike Iran, Palestine, Republike Hrvatske, Sjedinjenih Američkih Država, Republike Mađarske, Ujedinjenog Kraljevstva Velike Britanije i šef Misije OSCE-a zasadili su tokom aprila i juna lipe u Aleji ambasadora, pridruživši se tako listi od 150. visokih zvaničnika koji su na taj način ostavili svoj trag u BiH.

Ekselencije Jakub Skalnik, češki ambasador u BiH; Dong Chunfeng, kineski ambasador u BiH; Seyed Hossein Rajabi, iranski ambasador u BiH; Rezaq N.

M. Namoor, palestinski ambasador u BiH; Ivan Del Vechio, hrvatski ambasador u BiH; Maureen Cormack, američka ambasadorica u BiH; Negyesi Jozsef, mađarski ambasador u BiH, Edward Alexander de Poulton Ferguson, britanski ambasador u BiH i Jonathan Moore, šef Misije OSCE-a u BiH s načelnikom Ibrahimom Hadžibajrićem i predsjedavajućim Općinskog vijeća Vedranom Dodikom zasadili su lipe u Aleji ambasadora. Ova poznata starogradska šetnica trenutno broji 150 lipa.



Dodik, Cormack i Hadžibajrić



Jonathan Moore



Chunfeng, Hadžibajrić, Rajabi, Namoor i Skalnik



Dodik, Hadžibajrić i Del Vechio



Jozsef i Ferguson

Uređena Aleja ambasadora



Zamijenjena 43 stabla lipe

Projekat revitalizacije i vegetativnog uređenja popularne šetnice Aleje ambasadora uspješno je realizovan tokom mjeseca maja. Ukupno 43 stabla lipe su zamijenjena novim jer su bila oštećena ili bolesna, te se pristupilo revitalizaciji Aleje ambasadora. Osim toga, urađeno je njihovo okopavanje i prihranjivanje, te se vrši redovni nadzor i prati stanje sadnica.

Na potpunom lokalitetu Aleje ambasadora urađeno je sezonsko vegetativno održavanje lipa, njih ukupno 149, okopavanje i prihranjivanje, zavisno od potreba. Osim toga, u Aleji je pokošena trava i izvršeno sakupljanje i odvoz neorganskog otpada, te je počelo njeno vegetativno uređenje. Potom je urađena sadnja šimšira i dunjarica, doprema biljnog materijala, treseta i korpi za smeće. Općina Stari Grad je, putem Službe za privredu, izvršila terenski obilazak lokaliteta i pregled svakog stabla od ulaza u Aleju ambasadora do lokaliteta "Da Riva", odnosno mosta na Moščanici kod Da Rive. Za potrebe revitalizacije stabala, te hortikulturnog i vegetativnog uređenja i održavanja Aleje ambasadora za ovu godinu bit će izdvojeno oko 17.000 KM. Za radove je angažovano KJP "Sarajevo-šume" d.o.o. Sarajevo.

Vrste lipa koje su sadene u Aleji su: bijela ili srebrna lipa (*Tilia tomentosa*), velikolisna lipa (*Tilia grandifolia*), sitnolisna lipa (*Tilia parvifolia* i *Tilia cordata*), cvijetna i drugi varijeteti. Na inicijativu Općine Stari Grad Sarajevo, 2002. godine pokrenut je Projekat formiranja aleje lipa pod nazivom "Aleja ambasadora" koja obuhvata prostor šetnicom duž rijeke Miljacke, odnosno prostor od Bentbaše do Kozije ćuprije. Šetnica je čitavom dužinom asfaltirana. Dužina Aleje je cca 2.800 m. Od 2002. godine do danas, zasadeno je 149. lipa.

Osim toga, početkom istog mjeseca urađeno je kompletno uređenje šetnice, od ulaza u Aleju ambasadora tj., od restorana „Bazeni“ pa do Kozije ćuprije. „Trava je pokošena na platou na Darivi, te cijelom dužinom šetnice s obje strane do Kozije ćuprije“, istakli su u Odsjeku za komunalne poslove Općine. Radove je izvodila firma "Hise A&A" iz Sarajeva, a vrijednost radova, koje finansirala Općina Stari Grad iznosila je oko 3.300 KM.



Uređena kompletna dionica

Asfaltiran dio ulice Mahmutovac



Sanirano 83 metra ulice

Projekat sanacije i asfaltiranja ulice Mahmutovac od broja 10 do 44, realizovan je u maju. S obzirom da je postojeći asfalt bio u lošem stanju, ulica je sanirana u dužini od 83 metra, „U sklopu projekta urađeno je uklanjanje starog asfalta, postavljanje novog tampona, te izdizanje šahtova i šibera na potrebnu visinu, zbog pravilne odvodnje“, pojasnili su u Odsjeku za komunalne poslove. Izvođač radova je bila firma KJKP „Rad“, a projekat je sa oko 32.200 KM finansirala Općina .

Saniran dio ulice Bistrik



Novi asfalt na dijelu ulice

Sanacija kolovoznih oštećenja u ulici Bistrik (od Rijaseta Islamske zajednice BiH, do ulaza u komandu Armije RBiH) urađena je tokom mjeseca maja. Ovaj dio ulice saniran je u dužini od 47 metara i prosječnoj širini od sedam do devet metara. Stari asfalt i tampon su uklonjeni, postavljen je novi tampon, izvršeno izdizanje šahtova i šibera, te asfaltiranje dijela ulice. Izvođač radova je bila firma KJKP „Rad“, a projekat je sa oko 17.500 KM finansirala Općina Stari Grad Sarajevo

Postavljeni metalni stubići kod Katedrale



Osam novih stubića kod Katedrale

Postavljeno je osam novih metalnih stubića na pločniku iza Katedrale, uz ulicu Mula Mustafa Bašeskija. Stubići će spriječiti prolazak vozila na pločnik iza Katedrale i okolni prostor. Radove je izvela firma KJKP „Rad“, a vrijednost je oko 1.200 KM. Finansijer je Općina Stari Grad.

Projekti

Uklonjena opasnost sa ruševnih objekata



Urušeni objekti u ulici Okrugla

Urušen je dupli objekat koji se nalazi u ulici Okrugla 36 i 38, na Mahmutovcu. Ovi ruševni stambeni objekti bili su u veoma lošem stanju i prijetila je opasnost od obrušavanja dijelova na ulicu, a samim tim i opasnost po živote i imovinu građana. Iz tih razloga, Općina Stari Grad je, putem Službe za investicije, komunalne u inspekcijске poslove, pokrenula proceduru urušavanja objekta.

“Uposlenici firme “Hise A&A” uklonili su dijelove koji su predstavljali opasnost, odnos-

no, urušili objekte,” pojasnili su u Odsjeku za komunalne poslove. Nakon što je Općina uklonila dijelove koji su predstavljali opasnost, pojavili su se vlasnici koji su odlučili da u cjelosti uklone ruševni objekat i očiste lokaciju.

Kako su kazali iz pomenute Službe, tokom aprila su rješavali još jedan slučaj ruševnog objekta i to u ulici Kamenica broj 37. Urušavanja objekata na sve tri lokacije koštala su oko 4.900 KM.

Saniran most na Boguševcu



Za sanaciju izdvojeno 11.000 KM

Izvršena je sanacija mosta na Boguševcu, oštećenog tokom prošlogodišnjih majskih padavina, koje su nanijele štete i u Općini Stari Grad. Usljed jakih padavina došlo je do obrušavanja dvije kamene gromade sa obližnje brane koje su pale u potok i preusmjerile tok vode. Iz tog razloga, voda je počela 'udarati' u most usljed čega su se pojavile pukotine, a stabilnost mosta postala je upitna. Općina je angažovala firmu Klico trans d.o.o. koja je sanirala nastalu štetu, prvo usitnivši i uklonivši kamene gromade

iz potoka, kako bi se osigurao neometan protok vode.

Nakon toga, ispod mosta je izljevena betonska ploča da bi se uspostavilo korito rijeke, te izgrađena dva manja betonsko-kamena potporna zida s obje strane mosta, kako bi se osigurala njegova stabilnost. Također, planirano je u narednom periodu osigurati dodatna sredstva za proširivanje i čišćenje toka potoka u tom dijelu. Za sanaciju je izdvojeno 11.000 KM, putem sredstava Službe za civilnu zaštitu Općine Stari Grad.



Nastavljeni radovi u Novoj Baruthani

Nastavljena je izgradnja kanalizacione mreže u najmlađoj starogradskoj ulici Nova Baruthana. I ove godine stanovnici ove ulice vrijedno realizuju projekte koje su od značaja za sve njih.

„Kada je riječ o ovom projektu, započeli smo ga prošle godine, a nastavili ove. Općina Stari Grad nam je prošle godine donirala materijal za postavljanje 400 metara kanalizacionih cijevi, a mi mještani sami izvodimo radove”, pojasnio nam je jedan od mještana Refik Dugić. Kako je istakao radovi se izvode po planiranoj dinamici i uskoro bi trebali biti završeni.

Samoinicijativno pokreću projekte

Ulica Nova Baruthana je jedna od najmlađih starogradskih ulica i u njoj je oko 80 domaćinstava. S obzirom da se ulica iz dana u dan sve više širi, kako nam je kazao Dugić, odlučili su da os-

nuju Inicijalni odbor koji je zadužen za prikupljanje sredstava, planiranje i realizaciju projekata, te za evidenciju o svakoj utrošenoj marki.

„Nismo mogli čekati nadležne da nam riješe probleme, a da bismo poboljšali uslove života u našoj ulici, odlučili smo da uzmemo stvari u svoje ruke. Sve je transparentno i radi se u dogovoru. Ovdje živi oko 80 porodica i da nismo složni, ništa ne bismo postigli“, istakao je Dugić i dodao kako svako domaćinstvo uplaćuju mjesečno po 10 maraka na zajednički račun.

„Do sada samo uložili velika sredstva. Iako smo se obraćali svim nivoima vlasti, jedino su nam ususret izašli Mjesna zajednica Moščanica i Općina Stari Grad Sarajevo, koja je prošle godine donirala materijal za postavljanje 400 metara kanalizacionih cijevi“, ističu mještani.

Sanirana kanalizacija u Alije Nametka

Urađena je sanacija kanalizacione mreže u dijelu ulice Alije Nametka. S obzirom da je na jednom dijelu ulice konstantno dolazilo do začepjenja, Općina je pristupila rješavanju problema.

Iz Odsjeka za komunalne poslove

Općine kazali su nam da je sanacija kanalizacione mreže urađena na trasi od 15 metara, te da su u sklopu projekta popravili i šahtove koji su se nalazili u neposrednoj blizini. Vrijednost projekta je bila oko 6.000 KM, izvođač radova je firma “Set invest”.

Asfaltirana ulica Sunulah efendije

Okončan je projekat sanacije desnog kraka ulice Sunulah efendije, u mjesnoj zajednici Logavina. S obzirom da je postojeći asfalt bio u lošem stanju, ulica je sanirana u dužini od 106 metara i prosječnoj širini od 3,5 metra.

„U sklopu projekta urađeno je uklanjan-

je starog asfalta, postavljanje novog tampona, te izdizanje šahtova i šibera na potrebnu visinu, zbog pravilne odvodnje“, pojasnili su u Odsjeku za komunalne poslove.

Izvođač radova je bila firma KJKP „Rad“, a projekat je sa oko 19.600 KM finansirala Općina Stari Grad Sarajevo.

Čolin potok – akcija čišćenja i ograđivanja



Postavljena zaštitna ograda

Na lokalitetu Čolin potok tokom maja su uklonjene velike količine otpada i korova, te izvršeno potkresivanje stabala i samoniklog šiblja. U drugoj fazi radova postavljene su zaštitne ograde na most iznad potoka.

Najveći problem u održavanju ovog lokaliteta predstavljaju nesavjesni građani koji, vozeći se mostom, zaustavljaju automobile kako bi bacili smeće s mosta u potok. Taj otpad se gomila i zajedno sa korovom, niskim rastinjem i šibljem stvara ozbiljan problem i onemogućava protok vode, te dolazi do začepjenja i izljevanja vode usljed većih padavina.

Općina je iz tog razloga, putem Odsjeka za komunalne poslove Općine, pokrenula akciju raščišćavanja Čolinog potoka (lokalitet gornji dio Hrida) i postavljanje zaštitnih mreža s obje strane mosta. Radovi su koštali oko 10.000 KM.

Asfaltiran put i parking pored Bakr-babine džamije



Projekat koštao 10.600 KM

Asfaltiran je dio ulice između Papagajke i Bakr-babine džamije i parking pored Bakr-babine džamije. „Urađena je kompletna sanacija prilaza arheološkom parku At mejdan i parkinga pored Bakr-babine džamije. Slivne rešetke i šahtovi izdignuti su na pravilnu visinu radi prikupljanja površinskih voda i postavljen je novi asfalt“, pojasnili su u Odsjeku za komunalne poslove. Projekat asfaltiranja dijela ulice i parkinga sa oko 10.600 KM finansirala je Općina Stari Grad, a izvođač radova je bila firma KJKP “Rad”.

Dani Općine



Dani
STARI GRAD

Dani Općine Stari Grad Sarajevo, od 02-18. maja, 2015. godine

Od tradicionalne posjete mezarima velikana do godišnjice postrojavanja Prve brigade policije ● U toku šesnaest dana realizovano 25 značajnih sadržaja ● Održana i prva međunarodna konferencija "Sarajevo i svijet" ● Svečano otvoren arheološki park At mejdan

Dan Općine Stari Grad, 02. maj, ove godine obilježen je bogatim programom i brojnim sadržajima realizovanim tokom 16 dana, od 02. do 18. maja, 2015. godine. Ukupno 25 različitih društvenih, kulturnih i sportskih događaja realizovano je u ovom periodu, od održavanja prve međunarodne konferencije "Sarajevo i svijet", svečanog otvaranja arheološkog parka At mejdan, Svečane sjednice Općinskog vijeća, pa do potpisivanja Sporazuma o bratimljenju sa gradom

Makarska i otvaranja novog sportskog igrališta "Mjedenača". No, krenimo redom...

Posjeta mezarima i podjela hedija

Tradicionalno, 02. maja, prisjećajući se značaja tog datuma prije 23 godine kada je odbranjeno Sarajevo i općina Stari Grad, delegacija Općine položi cvijeće i prouči Fatihu na tri lokacije. Prvo, na mezaru osnivača Sarajeva Isa bega Ishakovića, u Carevoj džamiji, potom na



Na mezaru Isa-begu Ishakoviću



Ekipa Osnovne škole "Vrhbosna" (Fejzić, Česko, Ljuca i Mešinović) osvojili su prvo mjesto na šahovskom kadetskom turniru koji je organizovao šahovski klub "Stari Grad". Drugo mjesto pripalo je ekipi Osnovne škole "Edhem Mulabdić" (Činjurević, Baličevac i Delić), dok je treće mjesto osvojio tim Osnovne škole "Hamdija Kreševljaković" (Kadrić, Kajanija, Drmala i Čomor). Najuspješnijim takmičarima dodijeljeni su pehari, medalje, diplome i šahovske knjige.

Nakon 20. kola i odigranih 60 utakmica BH Telecom fudbalske lige osnovnih škola Starog Grada, titulu najboljeg ponijela je ekipa Osnovne škole „Edhem Mulabdić“. Na terenu Centra za mali nogomet „Bentbaša“ veliko finale, 03. maja, odigrale su ekipe osnovnih škola „Edhem Mulabdić“ i „Mula Mustafa Bašeskija“, nakon čega je slavila ekipa sa Bistrika rezultatom 3:1. Treće mjesto pripalo je ekipi OŠ „Šejh Muhamed ef. Hadžijamaković“.

Predstavnik Hrvatske Kristijan Čuljat ponio je titulu najboljeg igrača na Međunarodnom turniru u tavli "Sarajevo Open 2015" koji se održao 02. i 03. maja, u Hotelu "Saraj", a finale u Vijećnici. Samid Dedaković iz Bosne i Hercegovine osvojio je drugo mjesto, a Attila Kenez iz

Mađarske treće mjesto. "Ovo je epohalan događaj za Tavla savez Bosne i Hercegovine, za sve igrače tavle i za naš grad", izjavio je direktor turnira Fikret Krka.

Konferencija "Sarajevo i svijet" među najznačajnijim sadržajima

Među najznačajnijim sadržajima realizovanim povodom Dana Općine, svakako je Prva međunarodna konferencija "Sarajevo i svijet" u organizaciji Općine i Međunarodnog foruma Bosna. Ovaj naučni skup u okviru kojeg su predstavljani, istraživani i vrednovani svi sadržaji uloge Sarajeva u bosanskoj politici, kulturi i ekonomiji privukao je više od 40 naučnika iz zemlje i svijeta, te brojne zainteresovane građane.



Zec, Hadžibajrić i Mahmutćehajić

turbetu Gazi Husrev-bega, najvećeg graditelja Sarajeva i na kraju na Šehidskom mezarju Kovači i mezaru prvog predsjednika RBiH, Alije Izetbegovića.

Istog dana, 250 porodica šehida i poginulih boraca, te nezaposlenih demobilisanih boraca i ratnih vojnih invalida okupilo se u Velikoj sali Općine na, sada već tradicionalnom druženju, kada su im uručene i novčane hedije, u iznosu po 100 KM. Boračka populacija u Starom Gradu nikada nije zapostavljena od strane općinskih vlasti, te su ovakva druženja, postala tradicija posljednjih godina, ali i druge vrste pomoći i podrške.

Takmičenja u tavli, šahu, fudbalu

Sportski događaji bili su rezervisani za 02. i 03. maj, te su građani imali priliku uživati u takmičenjima u šahu, tavli, ali i nogometu naših najmlađih, starogradskih osnovaca.



Ekipa OŠ "Edhem Mulabdić" pobjednici lige



Sa Međunarodnog turnira u tavli

U namjeri da sarajevskoj javnosti predstave značaj književnog djela Dževada Karahasana, organizatori su 03. maja u Domu oružanih snaga održali otvoreni razgovor "Sarajevo u književnim vidicima Dževada Karahasana" i to u tumačenjima Nikole Petkovića, uglednog stručnjaka u području komparativne književnosti, koji je predstavio autora i vodio razgovor. Književno djelo Dževada Karahasana prihvaćeno je u vremenu dužem od tri decenije kao neosporna kulturna pojava svijeta.

Drugi otvoreni razgovor upriličen je na temu "Sarajevo u likovnim vidicima Safeta Zeca", a u sklopu umjetničkih i naučnih sadržaja Prve međunarodne konferencije "Sarajevo i svijet". Organizatori su, uz prikaz odabranih sadržaja likovnog djela Safeta Zeca, pozvali književnike Dževada Karahasana i Sinana Gudževića, historičarku umjetnosti Nerminu Zildžo i teatrologa Miloša Lazina koji su u otvorenom razgovoru predstavili svoja viđenja Sarajeva u likovnim vidicima Safeta Zeca.

Dani Općine

Svečana sjednica u prepunoj sali Doma oružanih snaga

Ipak, najveći broj sadržaja realizovan je 04. maja, kada su u jednom danu potpisani Sporazum o bratimljenju sa gradom Makarska, održana Svečana sjednica Općinskog vijeća Stari Grad, svečano otvoren arheološki park At mejdan i upriličena svečana večera sa brojnim delegacijama pobratimskih općina koje su posjetile Stari Grad.

U ime svih građanki i građana grada Makarska i Općine Stari Grad Sarajevo, u duhu iskrenog prijateljstva, gradsko vijeće Makarske i Općinsko vijeće Stari Grad Sarajevo, odlučili su započeto prijateljstvo formalizirati u prijateljstvo i saradnju...

Ovo su riječi kojima počinje Sporazum o prijateljstvu i saradnji koji su 04. maja potpisali Općina Stari Grad Sarajevo i Grad Makarska, odnosno načelnik Ibrahim Hadžibajrić i gradonačelnik Tonči Bilić. „Ja bih kazao da je ovo formalizacija jedne višedesetlječne saradnje koja se nastavila i tokom 90 godina, kada Makarska nije bila razrušena kao nepokoreno Sarajevo, ali je primila dosta izbjeglica u svoje domove,“ kazao je prilikom potpisivanja gradonačelnik Bilić.

U prisustvu brojnih visokih zvanica, delegacija pobratimskih općina i predstavnika diplomatskog kora u BiH, 04. maja u 14,00 sati, u Domu oružanih snaga održana je Svečana sjednica Općinskog vijeća Stari Grad koju je otvorio predsjedavajući Vedran Dodik. Povodom Dana Općine Stari Grad dodijeljena su priznanja i



Svečana sjednica u prisustvu brojnih visokih zvanica

zahvalnice pojedincima i udruženjima. Svečanoj sjednici prisustvovala su brojne zvanice, među kojima su bili i gradonačelnik Burse Recep Altepe, načelnik Općine Osman Gazi, Mustafa Dundar, hrvatski ambasador u BiH Ivan Del Vechio, Ambasador Države Palestine Rezeq N.M. Namoor, Vatikanski nuncij u BiH Luigi Pezzuto, premijer Kantona Sarajevo Elvedin Konaković, delegacije iz turskih općina Umraniye, Silivri Makarska, Kragujevac, Buzet, Karpoš, Bosanska Krupa, Ulcinj, Ohrid, Krško, ali i predstavnici ambasada Makedonije, Saudijske Arabije, Grčke, Češke i Rumunije.

U kuturno-zabavnom programu nastupili su: hor RKUD “Proleter” sa numera-



Dodijeljena priznanja pojedincima i udruženjima

ma “Kad ja pođoh na Bentbašu” i “Svi dilberi”, nastavnica OŠ “Šejh Muhamed ef. Hadžijamaković” Amra Efendić sa splotom tradicionalnih pjesama i mlada umjetnica Lejla Čeušević uz klavirsku pratnju Zlatka Durakovića.



Del Vechio, Bilić, Hadžibajrić i Dodik

Izložba “Bosansko-tursko prijateljstvo”

Preko 1.000 kaligrafija izloženo je u Balkanskom mevlvijsko-istraživačkom centru u okviru izložbe “Bosansko-tursko prijateljstvo”, koju su 05. maja otvorili načelnik Općine Stari Grad Ibrahim Hadžibajrić, zamjenik načelnika Općine Seldžuk iz Konje Ali Ziya Yalçinkaya i ataše za vjerska pitanja Ambasade Republike Turske u BiH Hasan Atli. Vrijedne ruke 200 žena, koje su svoje slobodno vrijeme provodile učeći raznovrsne tehnike umjetnosti u Centru, izložile su preko 1000 radova kaligrafije.

At mejdan: U XIX stoljeću porušen, sada ponovo oživljen

Arheološkom lokalitetu At mejdan ponovo je udahnut život, nakon što su u XIX stoljeću reurbanizacijom austougarskih vlasti porušeni svi vjersko-prosvjetni objekti sagrađeni od strane Osmanlija: džamija, medresa, kutubha-



Restauriran arheološki park

Predstavljeno najbolje iz šest zemalja

Turistička tržnica, međunarodno takmičenje iz turizma za učenike srednjih turističkih škola iz regiona, održana je 11. maja, na Trgu oslobođenja-Alija Izetbegović. Učestvovalo je 17 učenika koji su predstavili turističku ponudu iz šest zemalja: Bosne i Hercegovine, Srbije, Crne Gore, Makedonije, Hrvatske i Slovenije. Na njihovim štandovima bilo je izloženo ono po čemu su gradovi i zemlje iz kojih dolaze prepoznatljivi, od brojnih turističkih prospekata i brošura, do suvenira, poslastica, umjetničkih radova...

na... Zahvaljujući velikodušnim donatorima iz turskog grada Bursa, sagrađena je Bakr-babina džamija, a 04. maja navečer je svečano otvoren i konzervirani arheološki park. Svečanosti su prisustvovala brojne ugledne zvanice, a među njima i gradonačelnik Burse Redžep Altepe. Načelnik Ibrahim Hadžibajrić i gradonačelnik Altepe su nakon obraćanja povelili goste u arheološki park Atmejdani čime je on i zvanično otvoren za posjetioce.

At mejdan je danas istovremeno park i arheološko područje, odnosno nacionalni spomenik BiH koji se sastoji od ostataka Bakr-babine džamije, Misrijine medrese, Kantamirijine kutubhane (biblioteke), mekteba i harema – mezaristana.

Po završetku ceremonije svečanog otvaranja domaćini su goste iz pobratim-



Hodžić i Karić održali historijski čas osnovcima

skih općina i druge zvanice ugostili na večeri u Hotelu "Europa".

Tri stotine osnovaca posjetilo Ratni tunel Butmir

U organizaciji Udruženja dijabetičara Kantona Sarajevo, 04. 11 i 18. maja provedene su akcije besplatnog mjerenja šećera u krvi za sve zainteresovane građane. Akcije su provedene u apotekama Pharmamed, Euopharm Centar i Lupriv, a odziv građana je bio izuzetno velik. Pored mjerenja vrijednosti šećera, građani su dobili isavjete stručnih lica, te promotivni edukativni materijal.

Tri stotine osnovaca iz Starog Grada i ove godine je, u okviru obilježavanja Dana Općine, posjetilo Ratni tunel u Butmiru gdje su im uposlenici Harun Hodžić i Midhat Karić održali edukativni, historijski čas uz dokumentarni film o opsadi Sarajeva, a potom ih povelili u obilazak Muzeja i samog Tunela.

„Gradnja tunela počela je u februaru, 1993. godine. Trajala je četiri mjeseca i četiri dana i sve se kopalo ručno, bez mašina. Kopalo je 280 ljudi. Tunel je dug 800 metara, visok 1,60m, širok 1 metar. Procjene stručnjaka su bile da se tunel ne može izgraditi zbog visokog nivoa podzemnih voda, i naišli smo na velike probleme zbog toga, ali smo uspjeli,“ ispričao je Karić okupljenim učenicima.

Otvoreno igralište "Mjedenica"

Sportsko igralište Mjedenica 07. maja je zvanično počelo sa radom otvorivši vrata svim polaznicima Zavoda za odgoj i specijalno obrazovanje djece Mjedenica, ali i drugoj djeci i mladima. Prigodnim programom polaznici Zavoda pozdravili su sve goste koji su došli da prisustvuju njihovoj svečanosti. Selmir Hadžić, direktor Zavoda Mjedenica, izrazio je zahvalnost bh fudbalskom reprezentativcu Asmiru Begoviću čija je Fondacija fi-



Revijalnom utakmicom otvoreno igralište "Mjedenica"

Dani Općine



Una Bejtović, PR i menadžer Fondacije Asmir Begović nansirala gradnju i Općini Stari Grad koja je ustupila potrebno zemljište. "Jedan od najsretnijih i najzadovoljnijih danas je zasigurno naš reprezentativac Asmir Begović koji je pokazao želju i dobru volju da se uključi u cijeli ovaj projekat i da ga zajedno sa ljudima iz Zavoda Mjedenica i i Općine Stari Grad dovede do kraja," kazala je Una Bejtović, PR i menadžer Fondacije Asmir Begović.

A, onda su uslijedili novi sportski događaji. Ekipe Policijske uprave "Logavina" i Osnovne škole "Šejh Muhamed ef. Hadžijamaković" pobijedili su na 14. Memorijalnom turniru u malom nogometu „Šehidima, poginulim borcima i ratnim vojnim invalidima“, održanom 07. i 08. maja.

Drugoplasirane su bile ekipe "Općina Stari Grad" i OŠ "Vrhbosna", a treće mjesto pripalo je timovima „Porodice šehida“ i OŠ "Mula Mustafa Bašeskija". Organizatori turnira, održanog u OŠ "Vrhbosna" bili su Udruženje RVI Općine Stari Grad i Organizacija porodica šehida i poginulih boraca Općine Stari Grad.

Dan nakon toga održan je osmi međunarodni Goalball turnir za slijepe Sarajevo 2015. u Katoličkom školskom centru. Učestvovalo je osam ekipa iz šest različitih zemalja, a najbolja je bila reprezentacija Slovenije. Na drugom i trećem mjestu bile su reprezentacije Bugarske i Hrvatske.



Osmi međunarodni Goalball turnir

Turnir je otvorio načelnik Ibrahim Hadžibajrić. Naglasivši da je Općina i ove godina stala iza organizacije ovog turnira i da mu je drago što se ovakav događaj odvija u okviru Dana Općine, Hadžibajrić se zahvalio učesnicima i zaželio im dobrodošlicu.

Manifestacije osnovaca i srednjoškolaca

Najmlađi građani Starog Grada i ove godine su dali značajan doprinos u obilježavanju Dana njihove općine.

"Djeca na dar Općini", manifestacija kojom su učenici starogradskih osnovnih škola predstavili bogat kulturno-



Sa manifestacije "Djeca na dar Općini"

muzički program, održana je 08. maja na Trgu oslobođenja - Alija Izetbegović. Program je počeo nastupom učenika OŠ „Šejh Muhamed ef. Hadžijamaković“ iz starogradskog naselja Hrid koji su napisali himnu Općini Stari Grad, a nastavljen je folklornim nastupom "Tradicionalne narodne pjesme" štićenika Zavoda za specijalno obrazovanje i odgoj djece "Mjedenica". Nastupili su horovi, folklorni ansambli, glumačke sekcije i brojni talentovani učenici iz svih starogradskih škola.

Nakon dvije godine priprema i mukotrpnog rada, prema riječima direktora prvog Internacionalnog dječijeg festivala u BiH, Fahrudina Kučuka, konačno su se stekli uslovi za njegovo održavanje.

Tradicionalni karate-kup "Stari Grad Open"

U nedjelju, 17.maja održan je 13. karate-kup "Stari Grad Open 2015." u Sportskoj dvorani "Amel Bećković" u Vogošći, uz učešće 31. kluba iz cijele BiH i 549 takmičara. Najuspješniji takmičar i takmičarka bili su Faruk Kadrić i Naida Kaljanac iz karate kluba "Stari Grad", koji su osvojili po tri zlatne medalje. Samim tim, najuspješniji klub je karate klub Stari Grad, dok je jedna od nagrada pripala i karate klubu Vezir iz Travnik, kao najbrojnijem klubu sa 31 takmičarem. Najbolji takmičari osvojili su medalje i pobjedničke pehare.

Dječiji festival ispunjen lutkarskim predstavama i nastupima horova, te plesnim tačkama polaznika plesnog studija "Astoria" održan je 09. maja, na Trgu oslobođenja-Alija Izetbegović i privukao veliki broj građana, naročito najmlađih.



I najmlađi učesovali



Koncert gradskog orkestra Kapellenchor iz Welsa održan u Domu oružanih snaga

Koncert orkestra Kapellenchor i Večer frankofona

Šetnjom pod nazivom "Gledate nas, a da li nas vidite?" oko sedamdeset članova Sportskog društva slijepih i slabovidnih Kantona Sarajevo, Saveza slijepih KS i učenika Zavoda sa slijepe i slabovidne „Nedžarići“ ukazali su na svakodnevne probleme sa kojima se suočavaju. Šetnja je upriličena uz podršku Općine Stari Grad Sarajevo, a učesnicima ovog događaja, pridružilo se i oko 120 učenika sedmih razreda osnovnih škola. Kolona je krenula ispred Spomenika poginuloj djeci Sarajeva gdje je položen vijenac, a kraj šetnje bio je na platou ispred zgrade Općine. Učesnicima šetnje su se pridružili i predstavnici zakonodavne i izvršne vlasti Općine Stari Grad, te brojni građani.

Oko stotinjak posjetitelja uživalo je u koncertu gradskog orkestra Kapellenchor iz Welsa, Republika Austrija, održanog 15. maja u Domu oružanih snaga BiH. Skoro pedeset članova orkestra putovalo je više od 14 sati kako bi održali ovaj koncert u Sarajevu i poklonili ga građanima u povodu Dana Općine Stari Grad. Načelnik Ibrahim Hadžibajrić zahvalio im se na tome, kazavši da mu je drago što je Općina Stari Grad mogla ugostiti orkestar Kapellenchor, kao i gradonačelnika Welsa Petera Koitza sa saradnicima. Nakon njihovih obraćanja, gosti su imali priliku uživati u jednosat-

nom koncertu orkestra kojim je dirigovao Walter Rešenida, a na repertoaru su se našla djela Johana Straussa, Ernsta Lutholda, Erica Swiggersa i drugih.

Na Trgu oslobođenja-Alija Izetbegović, načelnik Ibrahim Hadžibajrić i ambasadorica Republike Francuske u BiH, n.j.e. Claire Bodonyi, 17. maja navečer, ugostili su brojne frankofone i ostale prijatelje. Među gostima na "Večeri frankofona" bili su oni koji govore francuski jezik, ali i drugi koji su svojim prisustvom uveličali događaj i doprinijeli obilježavanju Dana Općine.



Večera frankofona na Trgu oslobođenja

Večeru frankofona organizovala je Općina Stari Grad, na ideju i uz podršku ambasade Republike Francuske u BiH. Vođena idejom o organizovanju tzv. večere u bijelom koja se obilježava u proljeće širom Francuske, ambasadorica Bodonyi je predložila da sličan događaj bude upriličen i u Starom Gradu.

Godišnjica postrojavanja Prve brigade policije SG

Prvi put od završetka agresije na

našu zemlju, porodice poginulih policajaca, pripadnika Prve brigade policije Stari Grad Sarajevo, okupile su se 17. maja u Hotelu "Europa" na druženju sa načelnikom Ibrahimom Hadžibajrićem i predsjedavajućim Općinskog vijeća Vedranom Dodikom. Ideju Sindikata policije Kantona Sarajevo, da u okviru Dana Općine bude upriličeno druženje sa ovim porodicama, načelnik Hadžibajrić spremno je prihvatio, želeći im dati do znanja da nisu zaboravljeni.

Polaganjem cvijeća na spomen obilježje na Trgu oslobođenja-Alija Izetbegović i kratkim obraćanjem Ismeta Dahića, prvog komandanta Prve brigade policije Starog Grada, 18. maja obilježena je 23. godišnjica od njenog postrojavanja. U prisustvu brojnih pripadnika ove brigade, te porodica poginulih policajaca, predstavnika izvršne i zakonodavne vlasti Općine Stari Grad i građana, učenjem Fatihe i minutom šutnje odata je počast poginulim pripadnicima Prve brigade policije Starog Grada. Ovaj događaj ujedno je obilježio i završetak programa obilježavanja Dana Općine Stari Grad.



Obilježavanje godišnjice postrojavanja

Podijeljena pčelarska oprema



Podijeljeno 167 košnica

Ukupno 48 korisnika iz Općine Stari Grad dobilo je nove košnice za pčele, a u okviru projekta 'Razvoj pčelarstva na području Općine Stari Grad', sa ciljem stimulisanja pčelarske proizvodnje. Ukupno je podijeljeno 167 košnica (bez pčela) i to za 40 pčelara koji već imaju iskustva u pčelarenju i osam pčelara početnika. Općina Stari Grad je, putem Službe za privredu, raspisala javni poziv za dodjelu pčelarske opreme, a svi prijavljeni morali su zadovoljiti određene kriterije: da žive i imaju košnice sa pčelarskim društvima na teritoriji Starog Grada, kao i potrebnu vodu na za bavljenje pčelarstvom, da su zakonski vlasnici zemljišta koje koriste i drugo. Osim toga, morali su ispuniti i posebne uslove: da poljoprivredno gazdinstvo sa košnicama pčela nije u blizini glavne saobraćajnice, da imaju prinos po košnici najmanje 5 kg, da poljoprivredno gazdinstvo koje tek počinje sa pčelarenjem ima u blizini voćnjak potreban za prinos meda i vodu za pčele i drugo. Po završetku javnog poziva, sačinjena je komisija koja je izvršila obilazak svih prijavljenih domaćinstava i sačinila foto dokumentaciju uz zapisnik, nakon čega je izvršen odabir korisnika koji ispunjavaju sve uslove i kojima je dodijeljena oprema. Budžet koji je obezbijeden za realizaciju ovog projekta je 10.000 KM.



Nove košnice za 48 korisnika

Projekti

Planirana izgradnja stadiona na Faletićima



U Faletićima će se graditi moderni fudbalski stadion

Počelo čišćenje terena, realizacija projekta iduće godine, prema projektu, dužina stadiona bit će 116, a širina 66 metara

Na mjestu nekadašnje kasarne u Faletićina, Općina Stari Grad Sarajevo iduće godine planira izgradnju modernog fudbalskog stadiona s pratećim sadžajem, tribinama i parkingom.

Stadion će se graditi na mjestu gdje je do sada bilo prihvatilište za pse, a koji

je prošlog mjeseca izmješten. Iz Odsjeka za investicije su nam kazali da je u toku čišćenje i uređenje prostora gdje je gradnja planirana. „Naredni korak je izrada glavnog projekta, jer tek nakon toga možemo pristupiti izgradnji stadiona“, pojasnili su u Odsjeku.

Završen idejni projekat

Firma „Coning“ iz Sarajeva je već uradila idejni projekat i prema njemu dužina stadiona s proširenjima će biti 116 metara, a širina 66 metara.

Projektom zadatkom predviđeno je da dužina igrališta bude 110, a širina 60 metara. Stadion će imati 3.500 mjesta za sjedenje, od kojih će 250 biti natkriveno i numerisano kao VIP sjedišta. Imat će i zajednički plato s četiri kapije, dok će službeni ulaz za VIP posjetioce biti odvojen. Na zapadnoj strani projektovane su prateće prostorije u sklopu kojih će biti svlačionice za sportiste i za rekreativce, ostave, prostorije za sudije i za delegate.

Na prvom spratu bit će kancelarije, sala za konferencije i sanitarije sa ostavom za čišćenje prostora, a na drugom spratu kafeterija sa VIP salonom.



Idejni projekat uradila je firma "Coning"



Edukacija o primjeni novog Zakona o javnim nabavkama

Stručna obuka o primjeni novog Zakona o javnim nabavkama za uposlenike Općine Stari Grad, održana je 04. juna. Edukaciju je na inicijativu sekretara organa državne službe, Diane Salihbegović

Obuhvaćeno pet tema

Predavanjem je bilo obuhvaćeno pet tema iz oblasti javnih nabavki i to: Postupci male vrijednosti, izrada ugovora, garancija za ozbiljnost ponude, garancija za dobro urađen posao, praćenje ugovora, Nabavke, Izrada tenderske dokumentacije (način izrade i sadržaj tenderske dokumentacije, tehničke specifikacije), Pravna zaštita i najčešće povrede zakona uočene od strane za razmatranje žalbi BiH i Prekršajne odredbe.

organizovala Općina u saradnji sa konsultantskom firmom „APKE“ iz Sarajeva.

Predavač je bio Edvin Šarić, certificirani trener Agencije za javne nabavke.

Kako nam je kazala Salihbegović, jučerašnja obuka uspješno je provedena za oko 40 učesnika, a bile su obuhvaćene sve službe koje su izrazile potrebu za obukom.

„Edukaciji prisustvovali su predstavnici Službe za civilnu zaštitu, Službe za privredu, Službe za investicije, komunalne i inspeksijske poslove, Službe za obrazovanje, kulturu, sport i lokalni razvoj, članovi Komisije za javne nabavke i predstavnici osnovnih škola sa područja općine Stari Grad, te Zavoda „Mjedenića“,“ pojasnila je Salihbegović.

Za ovu obuku Općina je iz budžeta izdvojila 3.500 KM.

Posjeta delegacije Opštine Karpoš

Savjetnik načelnika Opštine Karpoš, Perica Janevski i vijećnik Opštinskog vijeća Karpoš, Zoran Popovski, posjetili su 05. juna Općinu Stari Grad.

Domaćini su im bili pomoćnica načelnika za obrazovanje, kulturu, sport i lokalni razvoj Amina Deljković sa saradnicima. S obzirom da je Općina Stari Grad sa Opštinom Karpoš potpisala Sporazum o bratimljenju u maju, 2011. godine, njeni predstavnici boravili su u BiH, povodom ideje o projektu regionalnih sportskih igara na prostoru Balkana.

Prilikom posjete, gosti su prezentirali dostignuća razvoja obrazovanog sistema

na području Opštine Karpoš, odnosno rezultate strateških opredjeljenja u oblasti vannastavnih aktivnosti. „U tim okvirima poseban akcent je dat na školski sport gdje su prezentirani modeli kojima se došlo do izvanrednih sportskih dostignuća“, istakli su iz Službe.

U sklopu toga, Popovski je pokrenuo inicijativu o realizaciji projekta regionalnih sportskih igara na prostoru Balkana. Predviđeno je učešće Makedonije, Srbije, Crne Gore, Turske i Hrvatske, a ponuđeno je i Općini Stari Grad Sarajevo da se uključi kao predstavnik BiH, što je u načelu i prihvaćeno.

Poklon školskim bibliotekama



Prikupljene knjige za školsku biblioteku

Povodom obilježavanja Dana Općine, školskim bibliotekama u Starom Gradu poklonjene su knjige kojima će obogatiti svoj bibliotečki fond.

Općina Stari Grad Sarajevo je, putem Službe za obrazovanje, kulturu, sport i lokalni razvoj, obezbijedila za svoje najmlađe sugrađane neke od popularnih naslova lektira, a shodno potrebama koje su škole iskazale. Među naslovima koji su podijeljeni školskim bibliotekama su: „Patuljak iz zaboravljene zemlje“ Ahmed Hromadžić, „Medin rodendan“ Zehra Hubijar, „Maturalac“ Branka Primorac, „Kraljica iz dvorišta“ Bisera Alikadić, „Konrad“ Kristina Nestlinger, „Zvezdangrad“ Željko Ivanković, te klasici „Romeo i Julija“, „Dnevnik Ane Frank“ i druge.

Obilježen Dan škole „Vrhbosna“



Načelnik Hadžibajrić uručio zahvalnice

Prigodnom svečanošću učenika, nastavnika i uprave škole na Faletićima je proslavljen Dan škole „Vrhbosna“. Prisutne je pozdravio direktor škole Mirsad Lelo, a svečanom obilježavanju je prisustvovao i načelnik Općine Stari Grad Ibrahim Hadžibajrić. Gosti su uživali u brojnim izvedbama talentovanih učenika, od folkloru i predstave, do recitacija najmlađih učenika, plesnih tačaka i nastupa hora. Uprava škole zahvalila se svojim učenicima koji su izuzetnim rezultatima na školskim, ali i općinskim i regionalnim takmičenjima, doprinijeli podizanju ugleda i afirmaciji škole „Vrhbosna“.

Zahvalnice su podijeljene učenicima za izuzetne rezultate na sportskim takmičenjima, informatičkim, za afirmaciju škole na Festivalu sevdalinki, za pobjedu na takmičenju Cambridge University Press, za takmičenje iz prve pomoći i drugo. Svim učenicima zahvalnice je uručio načelnik Hadžibajrić čestitavši im na izuzetnim rezultatima i poželjevši im uspjeh i u budućem školovanju.

Predstavljamo uspješne male privrednike iz Starog Grada

Jedini ribnjak na lijevoj strani Miljacke Starog Grada

Nadomak Sarajeva, samo desetak kilometara od najuže starogradske jezgre u naselju Komatin u ulici Brajkovac, nalazi se malo imanje Moro koje se s puno pažnje i s velikom ljubavlju obrađuje i održava. Pedestjednogodišnji Emir Moro, kaže da se tu rodio i proveo cijeli svoj život sa suprugom, djecom i roditeljima. S obzirom da je nezaposlen prije par godina odlučio je da sa ocem, koji je nažalost u međuvremenu preselio, izgradi ribnjak i počne se baviti poljoprivredom.

Kako mu kroz imanje protiče mali potok, ogranak Bistrice, a iz ljubavi prema prirodi i ribama, prije dvije godine napravili su prvi bazen, a sada ih imaju tri. “S obzirom da smo imali potok koji se nije koristio, s ocem sam odlučio da napravimo bazene i tako smo 2012. godine počeli da uzgajamo dvije vrste ribe potočarku i kalifu. Tokom cijele godine imam riba, čak i zimi jer su otporne na niske temperature”, pojašnjava Moro.

Mnogi su tvrdili da uzgoj ribe na ovom mjestu nije moguć

Iako se nikada prije nije bavio uzgojem riba, kako kaže ideja za to je postojala još prije rata. Mnogi su mu govorili da uzgoj ribe na ovom mjestu nije moguć, međutim

Najčešće ljudi kupuju potočarku

“Tokom cijele godine imam riba. Nekad ih sam mrijestim, a nekad uzmem mrijest. Dva puta dnevno ih hranim, ujutro i naveče, a potrebno je šest do sedam mjeseci da bi se došlo do finalnog korištenja ribe”, kaže Moro. Dodaje da mu najčešće dolaze ljudi da kupuju potočarku koja može da naraste od 200 do 400 grama, jer je ljekovita i koristi se za rane. Kalifa može da naraste i do jednog kilograma.

otac i sin Moro su dokazali da je to itekako moguće.

“Svi su mi govorili da ribnjak ovdje ne može opstati, ali evo i sami vidite da može i meni je drago što sam uspio. Ovo jeste



Riba kalifa može da naraste do jednog kilograma


veliki posao, ali kad nešto volite i radite to s ljubavlju sve se može”, priča nam Moro.

voća i povrća koje im je neophodno za kućanstvo.

Pored poticaja za ribnjak od Općine dobio i plastenik

Pored uzgoja riba, Moro se bavi i plasteničkom proizvodnjom. Prošle godine od Općine Stari Grad Sarajevo pored poticaja za ribnjak dobio je i plastenik u kojem trenutno uzgaja paradajz, papriku, salatu, luk...

“Iako se poljoprivredom do sada nisam bavio, Općina mi je donirala i plastenik, tako da sada u njemu uzgajamo svega pomalo i u suštini živim od svog rada”, ističe Moro. Ovaj vrijedni čovjek, iako na nepristupačnom i brdovitom terenu uspijeva i da uzgoji kromir, ali i većinu drugog



U plasteniku uzgaja više vrsta povrća



Prije dvije godine zajedno s ocem pokrenuo ideju koja se rodila prije rata

Staro Sarajevo

Piše: **MUFID GARIBIJA**, sarajevski arhitekta

Žuta tabija, u narodu nazivana "Top"

Prostrani plato na krajnjim obroncima Ozrena, omeđen stijenama kanjona Miljacke i Mošćanice, bio je naseljen još u najstarija vremena. Njime je prolazila prastara rimska cesta, koja je od antičkog naselja na Ilidži, preko Kovača i Vratnika, krivudala prema Srebrenici (Argentaria). Već u srednjem vijeku na najistaknutijoj tački, gdje je danas Bijela tabija, sagrađena je tvrđava s pet visokih kula, koja se najvjerovatnije zvala Vratnik, a štitila je naselje Vrhbosnu, smještenu neposredno uz zidine i zgradu carine.

Četiri tabije, tri kapi-kule i pet kapija

Za vrijeme osmanske vladavine tvrđava je obnovljena i proširivana, a dodavane su joj pojedinačne pomoćne kule i zidovi pa je veći dio vratničkog platoa spašen od požara kada je Eugen Savojski 1697. godine, nakon tri dana pljačkanja, spalio cijeli grad.

Tek 1727. godine bosanski namjesnik Gazi Ahmed – paša Rustempašić Skopljak odlučio je da zidom opaše Vratnik sa 450 kuća i da unutar zidova ostavi dovoljno prostora za još toliko kako bi stanovnici Sarajeva imali sigurno utočište u ratno vrijeme.

Gradnja je završena 1739. godine u vrijeme Hekimoglu Ali-paše, do kada su izgrađene četiri tabije (bastiona), tri kapi-kule i pet kapija u zidinama.

Ova tabija je izgrađena u nepravilnom osmougaoniku od kamena, koji je sa ovih prostora. Dizala se kao mastaba, prvo su se gradili vanjski zidovi, a onda se punila kamenom. Kao vezivno sredstvo koristila se smjesa od jaja, soli i kreča. Dubrovački majstori su gradili i zidove i sve četiri tabije. Po zidovima su podignuti grudobrani, a na tvrđavama su bili postavljeni topovi. U Žutu tabiju ugrađeno je mnogo stećaka i starih nišana koji se i danas raspoznaju među kamenjem. Do tabije se nalazila kapija u zidini koja se otvarala ujutro, a zatvarala uvečer. Ostaci njenog luka bili su vidljivi sve do šezdesetih godina prošlog stoljeća.



Top oglašava vrijeme iftara

Jedna od tabija sagrađena je na stijeni Jekovac, po kojoj su je zvali Jekovačka tabija, ali je zbog svog žučkastog kamena dobila ime Žuta tabija, što je ostalo do danas. Ahmed-paša je za njenu gradnju vjerovatno uposlio dubrovačke majstore. Pomenuti lokalitet Jekovca ime je dobio po ubistvu uglednog sarajevskog kadije Nurdina Šerifovića, zvanog Nekib efendija. Bio je od loze poslanika Muhammeda a.s. a ubili su ga janjičari tokom svoje bune nakon što je Sultan odlučio ukinuti ovaj vojni red. Janjičari su ga na ovom lokalitetu kamenovali, a po njegovim bolnim jaucima čitav loka-

litet je prozvan Jekovac. Kadija Nurdin je ukopan odmah ispod same tabije.

U narodu je Žuta tabija često nazivana „top“, jer se u kasno osmansko doba na njoj uvijek nalazila jedna artiljerijska baterija. Tako je bilo i 1878. godine, kada je šutnja topova sa Žute tabije označila kraj otpora i početak austrougarske okupacije grada.

Iako je austrougarska vojska i dalje koristila Žutu tabiju, muslimanima je bilo dozvoljeno da u vrijeme mjeseca ramazana, topom oglašava vrijeme iftara. Taj običaj je bio zabranjen u vrijeme obje Jugoslavije, ali je obnovljen 1992. godine i traje do danas. Žuta tabija ili „Top“ spada u red najljepših i najpristupačnijih vidikovaca u Sarajevu.





Begova čorba za Ginisov rekord

Begova čorba od 4.120 litara za Ginisov rekord skuhana je ispred Doma oružanih snaga BiH, 17. maja, 2015. godine.

Najveću godišnju kuharsku manifestaciju u Evropi podržala je i Općina Stari Grad Sarajevo, a centralni događaj je posjetio i načelnik Općine Ibrahim Hadžibajrić.

Takmičenje kuhara trajalo je tri dana, a učestvovalo je oko 80 takmičara iz 15 zemalja svijeta.

Za spremanje čorbe bilo je potrebno 800 kg pilećeg mesa, 150 kg mrkve, 50 kg luka, pet kg bami-je, 70 kg brašna, 15 kg peršuna, 75 litara ulja, 15 kg putera i pet kg začina.